

四庫全書

子部

欽定四庫全書

子部

續名醫類案卷

五十八至
六十

詳校官太醫院吏目臣宋桂

編修臣倉聖脈覆勘

總校官編修臣王燕緒

校對官中書臣劉源溥

謄錄監生臣陳箴

欽定四庫全書

續名醫類案卷五十八

瘡瘍

錢塘魏之琇撰

陸肖愚治徐邑宰秋末冬初遍身生癰大小不一紅痛
炊薤黃水淋漓或謂風熱用防風通聖數劑不減或
謂諸痛瘡瘡瘍皆屬心火用苓連山梔生地等十劑
益甚且飲食漸減脉之浮數微按之又沈中帶緩而

弱曰凡風熱大都為癰疹未必為瘡癰至瘡瘍之為
心火經固言之第脉微弱為多此元氣不足也緩者
濕也數雖為熱而微數不可純責之火據今日之症
火為標濕為本原得病之由又濕為標元氣不足為
本此必乘虛汗出澡浴濕漬肉腠久而熱蝕為膿水
發為痛痒也用蒼朮苡仁茯苓燥熱為君人參白朮
黃芪甘草補氣為臣連翹蟬退清熱為佐葛根白芷
入陽明肌肉為使二劑痛痒頓減胃少開十劑全愈

張子和治穎臯韓吉卿自髀至足生濕蘪大者如錢小者如豆痒則搔破水到則浸淫類虫行袴襪愈而復生癰痕成四十餘年不瘥張哂之曰此濕蘪瘡也由水濕而得故多在足下以舟車濬川大下十餘行一去如埽

一省掾背項常有瘰癧愈而復生張曰太陽血有餘也先令漏泄之次于委中鉗針出紫血病更不復作也
一張君袞常喜熱火烘灼其背及兩足又食自死肉久

而兩足常生癰毒愈而復生半年餘以清涼飲子下之得紫黑血積于便中去者月餘其癰毒頓除是知積熱毒致癰腫者如此

薛立齋治春元沈電川之內暑月面生瘰癧乘涼入風面目浮腫越二日左臂腫痛癰疹如丹背脇髀股等處發腫塊三四肉色不紅痛甚晝夜號呼寒熱往來飲食不思服活命飲及行氣敗毒之劑其勢愈熾肝脉浮濡脾脉強硬此屬二經榮氣不足風邪乘虛流

注經絡為患先以八珍加黃芪柴胡青皮數劑腫處
漸漸紅腫又以十全大補加銀花白芷龍膽草貝母
十餘劑脇腿二處潰膿腕許餘塊漸平仍服十全大
補湯調理月餘而安向使專于祛風攻毒鮮不敗事矣
張仲安治凍瘡用黃柏燒存性研細以雞子清調敷破
者乾糝上神妙

治暑肌膚瘡爛或因搔成瘡多是大暑汗出坐卧濕地
致肌膚多瘡爛汁出有一乳母曰此易差也取乾壁

細土末敷之隨手即差

治一切惡瘡通用藥不効者陳米飯緊作團火煨存性
麻油膩粉調敷蘇韜光丁亥年耳上病碎瘡或痛或
痒兩月餘百藥不効季倖子長敷此方初不之信試
用之過日即愈辛丑年再作呂仲發顯謨云此症夏
以痰飲治之故只用肥皂燒存性生油膩粉調敷尤

佳

並集成
三條

薛立齋治一男子年四十三歲自四十已來每至夏發

熱而倦日午益甚晚涼少可面生瘡癰耳下筋微腫
更結小核三四枚附筋上曰此火令不慎房勞虧損
腎水不能制火然也名曰注夏彼不信服降火敗毒
藥加口乾倦急夜間熱甚午後腿軟足心熱筋牽痛
復來問治曰口乾倦急此中氣陷下也夜間發熱陽
氣陷于陰分也午後腿酸足熱陰虛火甚也耳下筋
牽痛血虛不能潤筋也先以補中益氣湯少用柴胡
升麻加五味麥冬熟地治之諸症頓退更服滋腎丸

而痊若以每至火令而然用敗毒涼藥鮮不危矣凡
春末夏初患頭痛脚軟食少體熱此仲景云春夏劇
秋冬差而脉弦大者正世俗所謂注夏病也

趙州守北方人年逾四十頭面生瘍瘡數枚焮痛飲冷
積日不潰服清熱消毒藥不應診其脉數按之則實
以防風通聖散二劑頓退又以荆防敗毒散而愈又
一男子患在四肢審其脉症亦屬有餘以黃連解毒
湯治之亦愈

繆仲淳治一婦人生癰臂上用連翹白芷白芨花粉各二錢甘菊一兩紫花地丁金銀花各五錢甘草生地茜草各三錢地榆四錢角刺牛蒡各一錢服之半日立出膿血而愈

廣筆記

又治一男子生癰膝下加牛膝

三錢立破出鮮血愈

丁右武親驗坐板瘡方松香五錢細研雄黃一錢細研如濕痒加蒼朮三錢各末和勻以綿紙包裹搥成紙撚二條臘月猪油浸透點火燒著取滴下油搽上立

効

全上

立齋治一男子逾四十胃氣素弱面常生瘡盜汗發熱
用黃芪建中湯少愈更以補中益氣湯而平東垣云
氣虛則腠理不密邪氣從之逆于肉理故多生瘡
若以甘溫之劑實其根本則腠理自固即無他疾
張生患漆瘡作嘔由中氣弱漆毒侵之以六君子湯加
砂仁藿香酒芍治之彼不信另服連翹消毒散嘔果
盛復求治仍以前藥外以麻油調鐵鏽末塗之而愈

趙千兵患兩腿生瘡每服敗毒藥則飲食無味反增腫
脹此脾虛濕熱下注也以六君子湯加蒼朮升麻酒
芍服之以黃蠟麻油各一兩輕粉三錢為膏貼之而
愈大凡下部生瘡雖屬濕熱未有不因脾腎虛而得者
一男子濕熱下注兩腿生瘡以人參敗毒散加蒼朮黃
栢服之以金黃散敷貼又一人患此久而不愈以船
板灰存性一兩輕粉三錢為散麻油調貼更以黃栢
知母防已龍膽草茯苓當歸川芎黃耆白朮服之並

愈若人兩腿生瘡作痛或遍身作痛以當歸拈痛湯治之

一婦人兩腿腕紫黯寸許搔破出水或用祛風砭血年餘漸腫如掌許乃服草烏等劑遍身瘙痒時出血水內熱體倦飲食無味月經三月一至脉洪而數按之則瀉此燥劑愈傷脾血也先以補中益氣湯加白芍川芎五味十餘劑乃與加味逍遙散加熟地鉤藤二十餘劑再用歸脾湯加川芎熟地治之而不發

一婦人素清苦四肢似癰疥作痒出水怒則起赤暈服
祛風敗毒等劑赤暈成瘡膿水淋漓晡熱內熱自汗
盜汗月經不行口乾舌燥此鬱傷脾血也用歸脾湯
逍遙散兩月而痊

一儒者素食膏粱發熱作渴飲冷患瘡如大麻風大便
出黑血服清熱祛風等寒藥益甚謂血分有熱火也
故寒之不寒用四物二連湯以清熱涼血用六味丸
以補腎生水而熱退又用柴胡梔子散調理而痊

一婦人性急善怒月經不調內熱口苦患時瘡服敗毒藥膿水淋漓熱渴頭眩日晡益甚用加味逍遙散服之漸愈因大怒月經如涌眼赤出淚用四物湯加山梔柴胡連苓數劑而愈年餘手足臂腕起白點漸大搔起白屑內熱盜汗月經兩月餘一至忽怒或惡寒頭痛或不食作嘔或胸乳作脹或腹內作痛或小便見血或小水不利或白帶下注此皆肝木制伏脾土元氣虛而變症也用補中益氣湯加黑山梔及加味

歸脾湯間服半年而愈

一婦人久鬱患在四肢腿腕尤甚誤用敗毒寒涼之劑
脯熱內熱自汗盜汗月經不行口乾咽燥此鬱火傷
脾也用歸脾湯數劑後兼服逍遙散五十餘劑而痊
劉松篁經驗方云會水灣陳玉田妻病天蛇毒瘡一老
翁用水蛇一條去頭尾取中截如手指長刮去骨肉
勿令病者見以蛇皮包手指自然束緊以紙外裹之
頓覺遍身皆涼其病即愈數日後解視手指有一溝

如小繩蛇皮內宛然有一小蛇頭目俱全也

本草綱目

孫思邈以貞觀五年七月十五日夜以手中指觸著庭木至曉遂患痛不可忍經十日痛日深瘡日高大色如熟小豆色嘗聞長者論有此方遂用治之手下即愈痛亦除瘡亦即瘥未十日而復如故方用蒲公英搗爛取汁塗之

上全

張子和曰麻先生妻病伐指痛不可忍酒調通經散一錢半夜先吐吐畢而痛減余因歎曰向見陳五曾病

此醫以為小虫傷或以草上有毒物觸之遷延數月膿盡方已以今日觀之可以大笑

王思中治一人患瘡疹陰囊腫脹如升不能跬步王曰此瘡蟲也就外利劑中加麥桿四十九莖遂消

吳江縣志

戊申之水乃二百餘年創見之變人足浸水中數日即皮破生瘡痛不可忍一法取水荊條煎水浴之立愈

續金陵瑣事

瘍症

吳性全忽患症如癘風眉毛脫落面額褪皮皮去肉色
又如白癩風耳前後目上下多生小瘡乳旁及腿上
亦有頗去膿血往時久病喘予以養肝之劑愈之自
是足趾縫及兩旁常作痒出稠水及面瘍既發足疾
頓失有指為風者有指為濕者有指為牛皮癬大麻
風者幸渠素不輕藥守至數月不愈乃就診余曰前
所指皆非也此即往時喘之變症耳良由肝火熾盛
火極似風上淫于肺蓋火就燥也前在經絡則為喘

今在皮毛則為痛薛立齋謂之癰瘍類症治之必五十劑乃瘳與生地杞子萸仁赤芍甘草麥冬淨銀花鮮首烏之屬出入加減果五十劑而愈夫肝木為龍龍之變化莫測其于病也亦然明者遇內傷症但求得其本則其標可按籍而稽矣此天地古今未洩之秘內經微露一言曰肝為萬病之賊六字而止似聖人亦不欲竟其端委迨以生殺之柄不可全操之人耳余臨症數十年乃始獲之實千慮之一得也世之君

子其母忽諸

患瘍便秘

薛立齋治一男子患癰未作膿焮痛煩躁便秘脉實用
內疎黃連湯二劑諸症悉退以四物加芩連四劑而消
一男子潰後便瀉脉浮按之則瀉以八珍湯加紅花桃
仁陳皮杏仁治之而愈

一弱人潰後便秘而脉瀉以四物湯加紅花桃仁黃芪
治之而愈

一男子潰後便秘而脉浮以四君子湯加陳皮杏仁當歸治之而愈

一老人潰後大便秘小便赤瀉診之脉浮數而瀉以八珍湯加知柏治之而已愈後小便復數而赤大便秘口乾目花以加減八味丸滋腎丸治之而愈此症乃陰血虛陽火盛故用前藥有效向投苦寒之劑必致有誤矣

一男子潰後便瀉肌膚作痒謂氣血虛不能營于腠理

用補劑治之不信乃服風藥致不救大抵瘡瘍始作便秘脉數而瀉者宜降火涼血為主潰後便秘脉瀉者宜補血氣為主若投風藥禍在反掌

鄭進士患癰將痊大便秘結服大黃等藥反廢飲食乃用補氣血之劑加桃仁麻仁未効更以豬膽汁深納穀道續以養氣血而愈原病式云諸澁枯涸皆屬于燥燥者火之氣病後血衰故大便秘澁宜以辛甘潤之如用苦寒則胃氣伐矣凡老弱產後便難皆氣血

虛也膽汁最効

腎臟風

薛立齋治一男子患腎臟風飲燒酒發赤暈砭出血數
追毒之藥成瘡出水日晡益甚類大麻風服遇仙丹
眉毛折落大便下血虛羸內熱飲食甚少勢誠可畏
先用聖濟犀角地黄湯其血漸止又用五味異功散
加當歸升麻飲食漸進用四物參朮丹皮內熱漸減
用易老祛風丸膿水漸少又八珍丹皮之類漸結靨

因思慮發熱盜汗作痒赤暈用加味歸脾湯數劑熱漸止用加味逍遙散六味丸而痊

一男子遍身生瘡膿水淋漓晡熱口乾兩足發熱形體消瘦襍服風藥六年未愈尺脉洪數而無力此腎經瘡也如小兒腎疳之症用加減八味丸不半載而痊

一男子遍身生瘡似疥非疥膿水淋漓兩腿為甚作痒煩熱肢體倦怠年餘不愈以為腎經虛火用加減八味丸痊

一男子素膏粱醇酒患腎臟風延及遍身服癘藥益甚
又用撚藥于被中熏之嘔吐腹脹遍身浮腫潰爛膿
水淋漓如無皮而死

一男子患足三陰虛患血風瘡症誤服祛風散毒之藥
外敷斑猫巴豆等藥肌肉潰爛嘔吐腹膨或泄瀉虛
冷或煩熱作渴此藥復脾胃虛敗也辭不治不越
月而歿

一男子患遍身小瘡或時作痒口乾作渴服消風散起

赤痒益甚服遇仙丹膿水淋漓飲食無度肌肉消瘦
尺脉洪數左尺尤甚謂腎水不足虛火上炎為患先
用加減八味丸其渴漸止用補中益氣湯加五味肌
肉漸生佐以八珍湯加丹皮麥冬百餘帖而痊二年
後不節房勞其瘡復作惑于人言又服消風散之類
其瘡復患仍用前藥而痊

一男子內臚作痒色黯搔起白皮各砭刺出血其痒益
甚更起赤暈延及外臚津淫不已服祛風之藥肢體

亦然不見效驗左尺脉洪大而數無力謂此腎經虛火復傷其血火益甚而患耳先以八珍湯加五味子丹皮三十餘劑諸症漸退乃佐以加減八味丸料又百餘劑而痊

劉鴻腿生濕瘡數年不愈尺脉輕診似大重按無力此腎氣虛風邪襲之而然名曰腎臟風瘡以四生湯治之不信自服苓連等藥遂致氣血日弱膿水愈多形症愈慘迨二年復求治仍以前藥治之而愈夫肢體

有上下臟腑有虛實世之患者但知苦寒之藥能消
瘡毒殊不知腎臟風因腎氣不足所致當以蒺藜為
君黃芪為臣白附子獨活為佐使若再服敗毒等藥
則愈耗原氣速其死矣

癘風

竇材治一人病癘症鬚眉盡落面目赤腫手足悉成瘡
瘻令灸肺俞心俞四穴各十壯服換骨丹一料二月
全愈鬚眉更生

一人徧身赤腫如錐刺竇曰汝病易治令灸心俞肺俞
四穴各一百壯服胡麻散二服而愈但手足微不隨
復灸前穴五十壯又服胡麻散二料全愈

一人面上黑腫左耳下起雲紫如盤蛇肌肉中如刀刺
手足不知痛詢其所以因同僚邀遊醉卧三日覺左
臂黑腫如蛇形服風藥漸減今又發竇曰非風也乃
濕氣客五臟之俞穴前服風藥乃風勝濕故當暫好
然毒根未去令灸腎俞二穴各百壯服換骨丹一料

全愈面色光潤如故

張子和治桑惠民病面風黑色畏風不敢出爬搔不已
眉毛脫落作癩醫三年張曰非癩也乃出素問風論
曰腎風之狀多汗惡風脊痛不能正立其色黑面癭
然浮腫今公之病腎風也宜先刺其面大出血其血
當如墨色三刺血變色矣于是下針自額上下鉋針
直至顙頂皆出血果如墨色徧腫處皆針之惟不針目
銳眥外兩旁蓋少陽經此少血多氣也隔目又針之

血色乃紫二日外又刺其血色變赤初針時痒再刺則覺額痛三刺其痛不可忍蓋邪退而然也待二十餘日又輕刺一遍方已每刺必以水洗其面血十日黑色退一月面稍赤三月乃紅白但不服除根下熱之藥病再作張在東方無能治者

吳恕字如心錢唐人博極羣書少貧賃烏蛇丸治瘋疾時采風使適有患此疾者召恕與談驚服其議論遂委托治之疾果愈

杭州府志

秘韞治大風用大烏蛇一條打死盛之待爛以水二碗浸七日去皮骨入糙米一升浸一日晒乾用白雞一隻餓一日以米飼之待毛羽脫去殺雞煮熟食以酒

下之喫盡以熱湯一盆浸洗大半日其病自愈

本草綱目

王海藏云王氏患大瘋病眉髮墮落掌内生瘡服紫苑丸半月瀉出癩虫二升如馬尾長寸許後愈紫苑吳

茱萸菖蒲柴胡厚朴各一兩桔梗茯苓皂莢桂枝乾

薑黃蓮蜀椒巴豆

去皮膜用油炒

人參各五錢川烏三錢加

羌活獨活防風各一兩蜜丸桐子大每服三丸漸加至五九七丸生薑湯送下食後臨卧服孕婦忌之此方治病甚多不能悉錄

周子固治王君海子病癘衆醫莫能療周授七藥漱之牙齦出穢血數斗既而形盡瘦骨立後第以美味補

之數月瘡

九靈山房集

薛立齋治一男子冬間口苦耳鳴陰囊濕痒來春面發紫塊微腫麻木至冬遍身色紫不知痛痒至春紫處

但大至夏漸潰又至春眉落腫潰此患在肝膽二經
令刺手指縫并臂腿腕出黑血先與再造散二服下
毒穢更以小柴胡合四物湯加白芷防風天麻角刺
漸愈又與換肌散但遍體微赤此血虛有火因家貧
未得調理秋間發熱至春面仍發塊用前散并養血
藥喜年少謹疾得愈

一膏梁之人鼻壞眉落指脫體潰熱渴晡甚四物湯加
酒炒黑知柏五味麥冬白芷天麻角刺三十餘劑熱

渴少止時仲夏精神倦怠氣喘身熱小便黃數大便
稀溏此元氣虛而時熱勝也用補中益氣湯頓安乃
與換肌散及益氣湯兼服兩月更以生肌散代茶飲
瘡少退至仲秋眩暈少食自汗體重大便溏數此亦
時濕之症用清燥湯調理而愈又用補中益氣湯少
加酒炒黑知柏角刺天麻兩月餘而痊又因勞倦耳
聾熱渴誤服祛風藥病氣益劇身發赤疹與益氣聰
明湯月許而愈

一男子赤痛熱渴膿水淋漓心煩掌熱目昧語瀼怔忡
不寧此心經受症也用安神丸兼八珍湯少加木通
炒黑黃連遠志元氣漸復却行砭刺外邪漸退但便
燥作渴用柴胡飲并八珍湯而愈再用換肌散而瘡
一男子肚見青筋面起紫泡發熱作渴寅卯時甚脉弦
數腿轉弱小便瀼此肝經火症先用柴胡飲熱退便
利却用小柴胡合四物湯加龍膽草炒山梔三十餘
劑及八珍湯加柴胡山梔養其氣血乃用換肌散去

其內毒而安年餘因勞役飲食失宜寒熱頭痛遍身赤疹自用醉仙散而歿

一男子面發紫疣瘡膿水淋漓睡中搐搦遍身麻木漸發赤塊勞怒則痒肝脉洪大砭刺臂腿腕各出血用清胃湯加大黃角刺四劑煎下瀉青丸肝脉少退以升麻湯數劑下前丸諸症少愈却用寶鑑換肌散斤許又用小柴胡合四物湯加蒼朮天麻角刺百餘劑及六味地黃丸半載而愈後因勞遍身麻痒脉微而

遲此氣血俱虛不能榮于腠理用十全大補湯加五味麥冬調理年餘而安

一男子面赤發紫泡下體痒痛午後發熱大便燥黑此火盛而血虛也用再造散及四物湯加防已膽草及刺腿指縫出毒血而便和仍以前藥加白朮白芷茯苓羌獨活而便黃仍以四物去膽草防已少用獨活加元參草薢五十餘劑而瘡退却用補中益氣湯加天麻麥冬而氣血漸充時仲秋霖雨遍身痠痛用清

燥湯而安隨用換肌散胡麻散八珍湯兼服而愈

一上舍面發腫肌如癰後變疣瘡色紫搔之出水此脾肺之症也先用清胃湯以清胃熱解表毒又用四物湯加山梔黃芩柴胡角刺甘草節以養陰血祛風熱及砭臂腿腕手足指縫并患處以出毒血疎通隧道乃與八珍湯加白芷角刺五加皮全蝎及二聖散兼服月餘以養陰血治瘡毒又與補氣瀉榮湯少愈再與換肌散而全愈後因勞倦遂發赤暈日晡尤甚以

四物湯加丹皮柴胡山梔并用補中益氣湯年餘雖勞而不發

一男子遍身如癬搔痒成瘡色紫麻木按之則痛小便數而少此脾胃受症邪多在表用清胃散更砭刺患處并臂腿腕出黑血神思漸爽但惡寒體倦口乾此邪氣去而真氣虛也以大劑參芪芎歸蒺藜桔梗數劑元氣頓復却用八珍湯加黃耆白芷蒺藜天麻軟柴胡及二聖散治之其瘡漸愈後用換肌散八珍湯

等藥調理半載而痊後仍發誤用剋伐攻毒患兩感
傷寒而死

一男子遍身疣瘡搔則痒按則痛便閉作渴此邪在內
也治以再造散二服微下三次用桃仁承氣湯加當
歸四劑及砭出黑血漸知痛痒但形體倦怠用培養
之劑復其元氣又用二聖散其瘡頓愈更用大補年
餘而康後患痰涎壅盛舌強語濇用二陳蒼朮知柏
澤瀉四劑而愈再用補中益氣湯調理而安

一男子素清苦眉盡落病在肝膽二經也乃刺臂腿腕及患處出黑血空心服八珍湯加五味胡麻首烏威靈食後服換肌散喜其無煎燮之症又能篤守禁忌不半年而痊

一儒者脚心或痒痛或麻痒腫脹二年後身體作痒漸變疙瘩發熱耳鳴日晡益甚此屬腎虛也乃砭刺臂腿腕及手足指縫去其瘀血用六味地黃丸料加五味柴胡五十餘劑以補腎又用換肌散祛風丸以治

瘡各斤許瘡漸愈得滋補守禁而痊

一上舍遍身患之形體俱虛謂須用調補元氣完復方治其瘡不信服蛇酒以攻內毒更敷砒霜等藥以蝕外毒頓加嘔吐清水體痛如錐或以為毒氣外發不知脾主肌肉此因毒藥脾傷而然也反服祛毒之劑吐瀉不止而歿

一男子用藥湯熏洗汗出不止喘嗽不食腹鳴足冷肢體抽搐謂此因熱傷元氣腠理不密汗出亡陽耳是

日果卒

下疳

此症與梅毒無甚差別

丹溪治一隣人年三十餘性狡而躁素患下疳瘡或作或止夏初患白痢膈上微悶醫與理中湯四帖昏悶若死片時而甦脉之兩手皆濇重按畧弦似數曰此下疳瘡之深重者與當歸龍薈丸去麝四帖而利減與小柴胡去半夏加黃連白芍川芎生薑煎五六帖而安

薛立齋治一男子下疳腫痛不消一男子潰而腫痛發熱小便秘瀉日晡或熱一小兒腫痛諸藥不應俱以小柴胡湯吞蘆薈丸數服而愈

一小兒十五歲患前症襍用消毒之藥虛症悉具二年餘矣詢之乃稟受所致用萆薢湯月餘諸症漸愈又用補陰八珍湯補中益氣湯而瘥

一男子陽事腫痛小便如淋自汗甚苦時或尿血少許尺脉洪數按之則瀉先用清心蓮子飲加牛膝山梔

黃柏知母柴胡數劑更以滋腎丸一劑而痊王機微
義曰如自汗小便少不可以藥利之既已自汗則津
液外亡小便自少若再利之則營衛枯竭無以制火
而煩熱愈甚當俟熱退汗止小便自行也兼此症乃
陽明經病大忌利小便

張景岳治一少年因偶觸穢毒遽患下疳始潰龜莖敷
治不効旋從馬口延入尿管以漸而深直至肛門遂
節腫痛形如魚骨每過夜則膿結馬口脹不得出潤

而通之則先膿後尿數洗皆不能及張嘗遇一山叟
傳得槐花藥方因以治之不十日莖根漸愈半月後
自內達外退至馬口而痊後瘡濕尚未淨復與五加
皮飲十餘劑而愈向傳方者曰此方善治淫瘡熱毒
悉從小便泄去且服此者可免終身瘡毒後患然猶
有解毒奇驗則在發瘡之時但見通身忽有雲片紅
斑數日而沒者即皆瘡毒應發之處瘡毒已解瘡形
猶見是其驗也張初未之信及此人瘡發之時瘡固

不多而通身紅斑果見凡兩日而消

方在景岳全書

立齋治州守姜節甫患下疳膿水淋漓作渴吐痰午前惡寒午後發熱曰午前惡寒屬陽氣虛弱午後發熱屬陰血不足不信反服二陳知柏之類飲食益少大便不實又日晡熱渴小腹重墜患虛炊腫恪用四物知柏之類飲食不思此脾氣虛而下陷先用補中益氣湯調養脾胃以升陽氣諸症漸愈又用六味丸滋補腎水以生肝血而痊

一男子患此腫硬焮痛寒熱先以人參敗毒散二劑而止更以小柴胡湯加黃連青皮治之而愈

一男子潰而腫痛小便赤澀以加減龍膽瀉肝湯加青皮黃連二劑少愈又以小柴胡湯加知柏當歸茯苓數劑愈

一男子因勞莖竅作痒時出白物發熱口乾以清心蓮子飲治之而安

一男子潰而腫痛發熱日晡尤甚以小柴胡湯加黃連

知母當歸而愈

一男子已愈惟莖中一塊不散以小柴胡湯加青皮荆防服之更以荆防牛膝首烏滑石甘草各五錢煎湯熏洗各數劑而消

一男子陰莖或腫或作痛挺縱不收一男子莖中作痛筋急縮或作痒白物如精隨溺而下此筋疝也並用龍膽瀉肝湯治之皆愈張子和曰遺溺閉癰陰痿浮痺精滑白淫皆男子之疝也不可妄歸之腎冷若血

酒不月月罷腰膝上熱足蹙嗑乾癢閉少腹有塊或
定或移前陰突出後陰痔核皆女子之症也但女子
不謂之疝而謂之瘕

一男子下部生疳諸藥不應延及遍身突腫狀似翻花
筋牽骨痛至夜尤甚此肝腎二經濕熱所致先以導
水丸五服次以龍膽瀉肝湯數劑再與除濕健脾之
藥外貼神異膏吸其膿隔蒜灸拔其膿而愈若表實
者以荊防敗毒散裏實者以內疎黃連湯表裏俱實

者防風通聖散表裏俱虛者八珍湯氣虛者四君子湯血虛者四物湯俱加兼症之藥治之並愈

傷科大
法器具

此若服輕粉等藥反收毒于內以致迭發槩服防風通聖散氣血愈虛因而不治者多矣

繆仲淳治數友下疳用黃柏官粉膩粉杏仁珠末冰片敷之無不愈者後去膩粉杏仁加黃芩更以小大薊地骨皮湯洗淨敷之効更良

廣筆
記

仲淳治下疳極秘神方鮮小薊鮮地骨皮各五兩煎濃

汁浸之不三四日即愈一切極痛者屢用神効

全上

立齋治一老人患疝小便淋漓脉細體倦此氣虛兼濕熱也用清心蓮子飲及補中益氣湯治之而愈又一弱人拘中作痛小便淋瀝此因火燥下焦無血氣不能降而滲泄之令不行用四物湯加黃柏知母茯苓牛膝木通十餘貼痛止便利先君氣短拘中若瘡小便不通製四物湯加參芪煎吞滋腎丸而愈蓋前症以虛為本以病為末益其本則末自去設若不固元

氣專攻其病害滋深矣

王錦衣年逾四十素有淋患疳瘡歟痛倦怠用小柴胡湯加黃連黃柏青皮當歸而愈

梅瘡

李時珍曰今醫家有搜風解毒湯治楊梅瘡不犯輕粉病深者月餘淺者半月即愈服輕粉藥筋骨攣痛癰瘕不能動履者服之亦効其方用土茯苓一兩苡仁金銀花防風木瓜通白蘚皮各五分皂莢子四分氣

虛加人參七分血虛加當歸七分水二大椀煎飲一

日三服忌飲茶及牛羊雞鵝魚肉燒酒法麵房勞蓋

秘方也

本草綱目

縣中陳某家有使女生廣瘡求醫于方上道人其方只

用乾荷葉一味煎濃湯當茶日逐飲之盡量而止不

過六七日即愈親試驗甚又一當縣甲首者生廣瘡

傳方上人方用麥母子草根搗汁和好酒同服即愈

其草須取竹中無露水者為上

李謂戒
卷漫筆

馮楚瞻治張姓人曾患梅毒清涼解毒而愈未幾忽頭
顱面頰鼻柱牙牀疼痛不堪飲食難進謂餘毒為害
復用清涼解毒漸至飲食俱廢坐卧不能精神疲困
六脉微弱馮曰果屬陽毒脉宜洪大此為寒涼久服
致陰陽失職耳即惡瘡初發亦由精血元陽虧損斯
陰寒凝滯之氣得以乘之乃與大劑熟地麥冬白朮
牛膝五味附子蕪八味丸並服半月全愈

孫文垣治吳東星瘰止腰痛白濁咳嗽肌肉大消百治

不應痛劇欲死脉之左弦細右滑大俱六至口渴眼
赤知其昔患梅瘡餘毒尚伏經絡因瘡後氣血不足
舊毒感動故痛而暴也以當歸白芍甘草牛膝鈎藤
苡仁木通白蘚皮用土茯苓四兩煎湯煎藥服下痛
止嗽除脉緩其半數帖大効精神漸復冬至日乘酒
縱慾次日腰如束縛足面疼右眼赤小水短足底有
火從兩胯冲上痛不可言再以歸芍鈎藤甘草牛膝
苡仁紅花生地黃柏三日症畧減適大雪寒甚有女

醫因其大便燥結一日夜進元明粉一兩五錢後大
去而腰痛愈猛兩足攣縮氣息奄奄面青燥六脉俱
伏痛使然也知服元明粉所致曰症雖熱但病在經
絡筋骨間徒瀉腸胃無益也足攣腰痛者由天氣寒
極經絡凝滯法當散寒邪之標使痛定然後治本乃
用桂心杜仲炙草蒼朮破故紙五加皮二劑痛定四
肢柔和飲食始進囑曰疾在經絡俟春和始可除之
勿亟也不信更服滋陰降火之劑兩月無功再求治

乃以煨腎散進大瀉五六度

仍是瀉其腸胃矣

四肢皆冷咸

以為瀉之非也曰病從此減矣夫何憂再進理脾藥
數帖神氣遂轉腰胯柔和漸能步履乃以威靈仙末
二錢入猪腰內煨食之又瀉一二度審其梅毒濕熱
已清改用苡仁當歸生熟地白芍牛膝黃柏丹參龜
版調理全安

朱懷竹壯年客外不謹患楊梅瘡恐人知之欲歸乃求
速愈用藥熏洗不瘳又用藥末點之日服煎藥三帖

治兩月毒且入內下則肛脫瘡滿如葷上則肺壅喘
盛胸脹不能仰卧內熱惡寒譫語陰囊疔瘡腫痛兩
足瘡延腫大脉之俱洪大而數曰病重甚幸壯年猶
可治第胸中有瘀血毒物俟出後乃可與藥否則反
用致疑另延醫果大發喘嗽吐紫黑血塊如膿者枕
許腥穢不可近此熏藥迫毒入肺瘀壅肺竅故喘嗽
必俟吐盡從而消之斯易為力也乃用丹皮桑白皮
白蘚皮木通前胡枳殼桔梗甘草杏仁苡仁葶藶服

後大便秘重二十餘次所下黑紫膿血甚多喘咳稍
定紅痰稍淡二三劑能卧改用白芍當歸白蘚皮貝
母黃連銀花皂角苡仁麥冬木通二帖足瘡腫漸消
陰囊出膿血二椀許兩尺已不洪大前方加丹參又
二帖囊結疤三日後落下厚可半寸洞見兩丸係一
光薄白胞用紅粉霜加生肌藥敷之日三次膿水乾
再以人參歸芍白芷甘草白蘚皮皂角苡仁首烏調
理一月悉愈令日用土茯苓猪肉各半斤同煮爛入

醬鹽如常食之湯當茶飲遂瘳次年生女

譚公亮患結毒醫用五寶丹餌之三年不効仲淳云五寶丹非完方也無紅鉛靈柴不能奏功時無紅鉛姑以松脂鉛粉麻油調敷應手而減公亮先用喬伯珪所贈乳香膏止痛生肌甚捷反用此二味功效彌良乃知方藥中不在珍貴之劑也

廣筆記

陸養愚治朱少川因感冒寒熱咳嗽筋骨疼痛服發散藥寒熱已除而疼痛咳嗽不止或以羌活治痛杏仁

治嗽不効又以其漁色必陰虛投六味月餘反口渴
異常身熱疼痛益甚脉之沉細弦數而有力因問其
曾患梅瘡否答曰已過矣曰此症正其遺毒也疼痛
者毒在經絡骨髓也咳嗽口渴者毒火上弦也用養
血解毒之劑倍土茯苓數劑而減十劑全愈

薛立齋治一男子遍身皆患梅瘡左手脉浮而數以荆
防敗毒散治之表症乃退以仙方活命飲六劑瘡漸
愈兼飲革蘚湯月餘而愈

一男子患下疳諸藥不應延及遍身突腫狀如翻花筋
攣骨痛至夜尤甚此肝腎二經濕熱所致先以導水
九五服次以龍膽瀉肝湯數劑再與除濕健脾之藥
外貼神異膏吸其膿隔蒜炙拔其毒而愈

一童子外腎患之延及小腹數枚作痛發熱以小柴胡
湯吞蘆薈丸更貼神異膏月餘而安

一儒者患前症先外腎作痒出水後陰囊股內小腹脇
臂發小癰或乾或膿窠誤服祛風等藥肢體倦怠惡

寒發熱飲食漸減大便不實脉見浮弦兩尺浮數此
腎水虛熱肝木乘脾土也用六味地黄丸補中益氣
湯為主佐以換肌消毒散而愈

一人患此服攻毒等藥患處凸而色赤作痛肢體倦怠
惡寒發熱脉浮而虛此元氣復傷而邪氣實也用補中
益氣湯二劑而愈

進士劉華甫患之數月用輕粉硃砂等藥頭面背臀各
結一塊二寸許潰而形氣消弱寒熱口乾舌燥唇裂

小便淋瀝痰涎上涌飲食少思此脾胃傷諸臟弱而虛火動也先用六君子湯二十餘劑又用補中益氣湯加山藥山萸麥冬五味服之胃氣復而諸症愈惟小便未清痰涎未止用加減八味丸而痊

一男子患楊梅瘡後兩腿一臂各潰二寸許一穴膿水淋漓少食無睡久而不愈以八珍湯加棗仁茯神服之每日以蒜搗塗患處灸良久隨貼膏藥數日稍可却用豆豉餅炙之更服十全大補湯而愈

一婦人患之皆愈惟兩腿兩臙各爛一塊如掌兼筋攣
骨痛三年不愈諸藥無効日晡熱甚飲食少思以草
薢湯煎逍遙散倍用茯苓白朮數劑熱止食進貼神
異膏更服八珍湯加牛膝杜仲木瓜三十餘劑而痊
一婦人患此燃輕粉藥于被中熏之致遍身皮塌膿水
淋漓不能起居以滑石黃柏菴豆粉末等藥鋪席上
令可卧更服神功托裏散月餘而痊

一云飲金
銀花散

一彌月小兒先于口內患之後延于身上年餘不愈以

草薺為末乳汁調服母以白湯調服月餘而愈

青浦四十二堡一大家娶妾生楊梅瘡遍身潰爛臨終
棄之于野一乞丐收養之數日不死女忽思食肉適
有數盜在孟渚墩祭賽丐者乞肉即與一肩懷歸食
婦食未盡者懸之樹枝為蜈蚣所食毒侵肉中婦食
之瘡為毒發旬日全愈其色更麗于前丐欲送歸婦
不許曰我當終身從君矣遂為伉儷生一子丐者日
操舟乞食龍潭其婦言笑不苟亦云賢矣

雲間稗誌
無名氏

立齋治一男子咽間先患及于身服輕粉之劑稍愈已而復發仍服之亦稍愈後大發上腭潰蝕與鼻相通臂腿數枚其狀如桃大潰年餘不斂神思倦怠飲食少思虛症悉具投以革薢湯為主以健脾胃之劑兼服之月餘而安

一婦人患之臉鼻俱蝕筋骨作痛脚面與跟各腫一塊三月而潰膿水淋漓半載不斂治以前藥亦愈

一男子陰莖患之腫痛先以導水丸龍膽瀉肝湯各四

服少愈再以小柴胡湯加黃柏蒼朮五十餘劑而平
一男子陰莖腫潰小便赤色肝脉弦數以小柴胡湯加
木通青皮龍膽草四帖又龍膽瀉肝湯數帖而痊
一婦人喉痛便秘作渴脉沉實以內疎黃連湯二劑裏
症已退以龍膽瀉肝湯數劑頓退間服革薺湯月餘
而愈

一男子患之發寒熱便秘作渴兩手脉實以防風通聖
散治之而退以荆防敗毒散兼龍膽瀉肝湯而痊

一男子愈後腿腫一塊久而潰爛不斂以蒜搗爛敷患處用艾隔蒜灸之更貼神異膏及服黑丸子并托裏藥兩月而愈

一男子皆愈但背腫一塊甚硬肉色不變年餘方潰出水三載不愈氣血俱虛飲食少思以六君子湯加當歸藿香三十餘劑少愈更飲草薢湯兩月餘而愈一男子患之勢熾兼脾胃氣血皆虛亦服前藥而痊

馬銘鞠治李行甫患微瘡

俗呼廣瘡

誤用水銀番硃等藥搓

五心三日間舌爛齒脫喉潰穢氣滿室吐出腐肉如
豬肝色湯水不入腹脹二便不通醫皆謝去獨用治
喉藥吹喉痰壅愈甚痛難忍幾死按其腹不痛雖脹
滿未堅猶未及心知水銀毒入腹未深法宜以鉛收
之急用黑鉛斤餘分作百餘塊加大劑甘桔湯料銀
花甘草各用四五兩水二三十碗鍋內濃煎濃取三
四碗入湯注中徐灌之任其自流逾時舌漸轉動口
亦漱淨即令恣飲數盞另取查再煎連前濃汁頻濯

手足次日二便去黑水無筭始安方用吹口藥及敗
毒托裏藥數劑而愈後賈僕有顏孝者亦患微瘡誤
用水銀重條其症如一行甫即以前法治之次日立
起

廣筆
記

白癰風

附紫癰風

薛立齋治一男子常咳嗽腿患白癰風皮膚搔起白屑
服消風散之類痒益甚起赤暈各砭出血赤暈開口
而痒愈甚服遇仙丹之類成瘡出水殊類大麻風咳

嗽吐痰面色皎白時或痿黃此脾肺二經虛熱之症
先用五味異功散治之虛熱稍退又用地黃清肺飲
肺氣漸清又用八珍湯六味丸而尋愈後又咳嗽痰
喘患處作痒用參蘇飲二劑散其風邪又用五味異
功散加桔梗補其肺氣而痊二年後咳嗽作渴飲水
脉洪大左尺為甚用加減八味丸補腎水而痊

一男子素不慎房勞嘗患足三陰虧損治愈後兩腿腕
患紫癰風延于兩股作痒各破出血痒處日甚服消

風等藥患處微腫延及上體兩眼昏濇謂腎臟風先用四生散四服後用易老祛風丸月餘用地黃丸兩月餘而痊後飲食起居失宜肢體色赤服二九隨愈一男子患白癜風過飲或勞役患處色赤作痒服消風散之類頓起赤暈遍身皆痒砭出血服祛風藥患處出血恪服遇仙丹患處愈煥元氣日虛先用九味蘆薈丸九味羌活湯諸症頓愈用加味逍遙散加味四物湯乃痊

一婦人患白癜風誤以為大麻風服蛇酒等藥患處焮
腫經水兩三月一行曰此肝血傷而內風也誤服風
藥必筋脉拘急不信仍作風治果身起白屑四肢拳
攣始信先用八珍湯四劑又用四君子湯二劑月餘
乃以四君子湯又用八珍湯二劑又月餘諸症漸退
元氣漸復又以四君子湯為主以逍遙散為佐將兩
月瘡靨脫落又月餘而愈

斑瘡

唐王琰云比歲有病天行發斑瘡頭面及身須臾周匝
狀如火燒瘡皆戴白漿水隨快隨生不治數日必死
治後瘡癰黤一歲方滅此惡毒之氣所為以水煮升
麻綿沾洗之苦酒煮彌佳但躁痛不可忍也又云建
武中南陽擊虜初呼為虜瘡諸醫參詳療之方取好
蜜摩瘡上以蜜煎升麻數拭之

外臺
秘要

繆仲淳治顧奉常女臂患紫雲風用稀莖蒼耳雄黃末之
醇漆為丸或疑漆有毒競沮之然竟以此藥收功

製漆

用生蟹黃攪和可化
作水入藥廣華記

一婦人患斑症作痒脉浮數以人參敗毒散二劑少愈
更以消風散四劑而安又用柴胡清肝散而愈

一婦人患斑症痒痛大便秘結脉沉實以四物湯加苓
連大黃槐花治之而便利用四物二連湯而瘡愈

一婦人患斑作痒脉浮以消風散四劑而愈

一婦人患斑作痒脉浮數以人參敗毒散二劑少愈更
以消風散四劑而安

一男子患斑色赤紫焮痛發熱喜冷脉沉實以防風通
聖散一劑頓退又以荆防敗毒散加芩連四劑而愈
舉人陸世明會試途中勞役胸患斑焮赤作痛頭痛發
熱形倦少食大便或溏或結小便赤濇此勞傷元氣
而氣火內動投補中益氣湯一劑頓退再劑而痊又
數劑而平復

一室女年十四天癸未至身發赤斑痒痛左關脉弦數
此因肝火血熱以小柴胡湯加山梔生地丹皮治之

而愈若因怒而致者亦宜治以前藥

一男子面起赤暈時或發腫臂手亦然搔起白屑服癘風藥內熱體倦脉大而虛此因元氣虛而陰血復傷用六味丸補中益氣湯而愈

一婦人身如丹毒搔破如癰熱渴頭暈日晡益甚此屬肝經風熱血燥用加味逍遙散而愈

一婦人身如丹毒搔破淋漓熱渴頭暈日晡益甚用逍遙散加炒山梔陳皮而愈又用八珍柴胡山梔丹皮

而痊

一婦人患前症誤服大麻風藥破而出水煩渴頭暈誠類風症六脉洪數心肝脾為甚曰風自火出此因怒動肝火血燥而生風耳非真風症也與逍遙散六味丸以清肝火滋脾血生腎水而痊

一婦人患前症搔破久不愈食少體倦此肝脾虧損陰虛發熱也先用補中益氣湯加川芎炒梔元氣漸復更以逍遙散而瘡愈

一婦人患赤遊風晡熱痒甚用清肝養血之劑不信乃服大麻風藥臂痛筋攣又服化痰順氣之劑四肢痿弱又一婦患前症數服風藥煎湯泡洗以致腹脹並歿一女子月經先期先發赤暈微腫作痒若遇氣惱赤痒益甚服祛風之藥患處更腫砭出紫血甚多其痒愈作謂肝火血燥風藥復傷血而為患也先用加味逍遙散清肝火益肝血赤痒少止用地黃丸滋腎水生肝木各五十餘貼而痊後因惱怒經水不止發熱作

渴患處赤痒先用加味小柴胡湯二劑諸症頓止又用加味逍遙散而安

天泡瘡

其症屬元氣不足邪氣所乘亦有傳染而患主在肝腎二經故多在下體發起楊梅下疳畧同

薛立齋治一儒者患天泡色焮赤作痛大便秘而不實服祛風敗毒等藥舌痛口乾脉浮而數此邪氣去而陰虛所致用六味丸料加山梔當歸四劑脉症頓退又用八珍湯加山梔丹皮瘡色漸白後用四君加歸芪而愈

一儒者患之誤服祛風消毒之藥復傷元氣因勞役過度內熱口乾齒齦作痛右關脉洪數而虛此脾胃受傷而火動用清胃散之類而愈

一儒者患之或成粒或成片或出水脾肺脉俱洪數此風邪所傷先用荆防敗毒散加草薢鉤藤數劑漸愈但口乾內熱用四物加山梔鉤藤銀花甘草節而愈後遍身搔痒內熱口乾佐以六味丸而瘥

一商人每勞役飲酒後則遍身生瘡服祛風敗毒之劑

面目胸背臂脇結一塊如桃栗凹凸痒痛膿水淋漓
氣血虛甚寒熱往來作渴痰涌此濕熱壅盛元氣虛
而不能愈也外敷當歸膏內服補陰八珍加草薢五
錢并換肌消毒散加乾葛鈎藤各一錢二十餘劑諸
症漸退仍以前藥為主佐以調理之劑兩月餘氣血
復而瘡愈

一男子焮腫痛發熱服祛風清熱藥愈熾診其脉沉實
乃邪在內也用防風通聖散一劑頓愈又荆防敗毒

散二劑而安夫此症雖屬風熱當審在表裏治無誤矣
一小兒患此焮痛發熱脉浮數挑去毒水以黃柏滑石
末敷之更飲荊防敗毒散二劑而愈

一小兒焮赤發熱以黃柏滑石末敷之飲大連翹湯二
劑少愈更以金銀花散而痊

毛閣老孫年十餘歲背側患水泡瘡數顆發熱脉數此
肺胃經風熱所致名曰天泡瘡遂以荊防敗毒散加
苓連服之外去毒水以金黃散敷之又四劑而愈

楊文魁腹患此症及腰背焮痛飲冷脉數按之愈大乃
表裏俱實也以防風通聖散一劑更敷金黃散勢減
大半再以荊防敗毒散二劑而痊

續名醫類案卷五十八

欽定四庫全書

續名醫類案卷五十九

錢塘魏之琇撰

跌撲

一字散治一切打撲傷損筋骨折宗子趙叔恭名公寅
以善鐵錘著名其父宰嵯縣日因與族人聚飲趙化
寺醉酒墜懸崖之下亟視之昏不醒人手臂已折鼻
得此二藥治之遂愈其後運錘如故叔恭嘗知大寧

監云韓希道知府傳五靈脂沒藥別研川烏頭草烏頭

俱去皮臍生用各四兩地龍乳香各半兩別研麝香半錢別研白膠香一兩

後四味加減些不妨右為細末每服一字溫酒調下凡如梧桐

子大加減自少至多服之亦可若腰已上損食後服

腰已下損食前服覺麻為驗未麻加藥麻甚即減一百

方

福州長樂縣一盜囚被笞捶身無全膚以情告獄吏求

買胡孫薑爛研取汁以酒煎或調服留滓以傅瘡不

數日平復如故

全上

濠梁靈泉寺僧傳治打撲傷損用半兩古文錢不拘多少以鐵錢貫之用鐵匣盛以炭火煨通紅盪盛好酒米醋各半升鐵鉗開匣取錢于酒醋中淬再煨再淬候蘇落盡如酒醋少再添錢淬盡澄去酒醋以溫水淘洗如此三次淘洗數多尤妙火毒不盡令人患啞既淨焙乾研極細入乳香沒藥水蛭等分同為細末每服半字或一字生薑自然汁先調藥次用溫酒

浸平服若不傷折即時嘔出若損折則藥徑下纏綴如金絲如弓上之筋神驗初服忌酒三日劉諒縣尉傳王丞相在東府時施一接骨藥云用半兩錢極有效驗恐即是此方也

同上

治打撲損腫痛不止用生薑自然汁米醋牛皮膠同熬溶入馬屁勃末不拘多少攪勻如膏藥以紙花攤傳腫處痛即止以多傳為妙紹興倅廳二人每用之得

効

全上

南臺掾梁彥思使閩而足不能履醫以風論或以脚氣
治經年不瘳項彥章診之六脉僅微數而他無所病
即探患處乃骨出不入肯綮耳施以按摩即愈

九靈山房集

南臺治書某公因趨走足失履而傷腕骨掌反于後者
六閱月矣衆醫不能治公知抱一翁精按摩曰幸予
治也翁令壯士更相摩從辰至申而筋肉盡腐遂引
其掌以揉之覺噉噉然有聲藥以兩月其足如常時

上全

瘀血腹痛

立齋曰予于壬申年被重車碾傷悶瞢良久復甦胸滿如築氣息不通隨飲熱童便一椀胸寬氣利惟小腹作痛吾鄉徐銀臺東濠先生與復元活血湯一劑便血數升許痛腫悉退更服養氣血藥而痊大凡損傷不問壯弱及有無瘀血停積俱宜服熱童便以酒佐之推陳致新其功甚大若脇脹或作痛或發熱煩躁口乾喜冷惟飲熱童便一甌勝服他藥不動臟腑不傷氣血萬無一失嘗詢諸營操軍常有墜馬傷者何

以愈之俱曰惟服熱童便即愈此其屢試之驗亦明矣戊辰年公事居庸關見覆車被傷者七人仆地呻吟一人未蘇俱令以熱童便灌之皆得無事又凡腫或傷損者以葱搗爛熱罨之尤妙

治一人仲秋夜歸墜馬腹內作痛飲酒數杯翌早大便自下瘀血即安此元氣充實挾酒勢而行散也

一男子跌傷腹痛作渴食梨子二枚益甚大便不通血欲逆上用當歸承氣湯加桃仁瘀血下而瘥此因元

氣不足瘀血得寒而凝聚也故產婦金瘡不宜食此
一男子失足墜梯腹停瘀血用大黃等藥其血不下更
加胸膈脹痛喘促短氣用肉桂木香末各二錢溫酒
調服即下黑血及前所服之藥而蘇此因寒藥凝滯
而不行故用辛溫之劑散之

一老人墜馬腹作痛以復元通氣散用童便調進二服
少愈更以四物湯加柴胡桃仁紅花四劑而安

一男子墜馬腸作痛以桃仁承氣湯加蘇木紅花下之

頓愈更以四物湯加花粉柴胡二劑而愈

脾傷腹痛

陳侍御墜馬腿痛作嘔服下藥一劑胸腹脹痛按之即止惟倦怠少氣診其脉細而濇曰非瘀血也乃痛傷氣血復因藥損脾氣而然耳投養脾胃生氣血之藥而愈

血虛脇脹

李進士季夏傷手出血不止發熱作渴兩脇作脹按之

即止此血虛也用八珍加軟柴胡花粉治之而愈更
用養氣血之藥調理而痊

血瘀脇脹

孫文恒治桂亭兄壯年原有濕熱痰積年逾艾偶墜轎
跌傷背脇外敷內攻而愈越十五年左脇痛手不可
近左脉弦數堅勁搏指小腹赤痛知為舊瘀及痰積
作祟以青皮赤芍黃連當歸尾各一錢桃仁錢半大
黃二錢滑石三錢臨服調元明粉一錢服下吐痰梔

餘大便僅行一次左胯及腿膝皆痛卧不安小腹
甚此瘀血欲行而未能也再與前方加減便三次皆
沉香色稠黏瘀物腹痛除胯痛仍在再與加減便行
四次所下紫黑如筋膜者甚夥諸症悉減因食雞湯
牛肉腹痛後重此餘積未盡欲再下之恐年高不任
曰藥力已到積已動行而後補庶無反顧之憂仍以
前藥去大黃調元明粉下二次瘀物如前之半諸痛
俱平用人參白芍甘草陳皮山查桂心當歸半夏調

理半月而愈

一男子跌仆皮膚不破兩脇作脹發熱口乾自汗類風症令先飲童便一甌煩渴頓止隨進復元活血湯倍用柴胡青皮一劑脹痛悉愈再劑而安發明經云凡從高墜下惡血流于內不分十二經絡聖人俱作風中肝經留于脇下以中風療之血者皆肝之所主惡血必歸于肝不問何經之傷必留于脇下蓋肝主血故也痛甚則必有自汗但人汗出皆為風症諸痛皆

屬于肝木況敗血凝滯從其所屬入于肝也從高墜下逆其所行之血氣非肝而何以破血行經藥治之一男子墜馬兩脇作痛以復元活血湯二劑頓止更以小柴胡加當歸桃仁二劑而安

血虛煩躁

吳給事墜馬傷首出血過多發熱煩躁肉瞤筋惕或欲投破傷風藥曰此血虛火動所致當峻補其血為善遂用聖愈湯二劑即安又養氣血而瘥

一男子損臂出血過多又下之致煩熱不止瘀肉不腐
以聖愈湯四劑少安以八珍湯加五味麥冬而安更
以六君子湯加芎歸黃芪數劑而潰又二十餘劑而
斂大抵此症須分所患輕重有無瘀血及元氣虛實
不可槩下蓋恐有傷氣血難以潰斂常治先以童便
和酒飲之或加紅花蘇木其功甚捷若槩用攻利之
劑鮮有不誤凡瘡愈之遲速在血氣之虛實故也

亡血出汗

張進士季秋墜馬亡血過多出汗煩躁翌日其汗自止
熱躁益甚口噤手顫此陰血虛陽火乘之而汗出為
寒氣收斂腠理故汗不得出火不得泄怫鬱內甚而
益增他症也

凡一切病火盛而汗出者若驟斂之反增他症

及用四物加柴

胡黃芩山梔四劑少止又用四物參芪軟柴胡五味
麥冬治之而痊

亡血昏憤

一婦人益冬傷足亡血頭汗內熱作渴短氣煩躁不時

昏憤其脉洪大按之微弱此陰血虛于下孤陽炎于上故發厥而頭出汗也以四物合小柴胡湯一劑汗即止以四物去川芎加參耆麥冬五味炙草少用肉桂四劑諸症悉去又三十餘劑血氣復而愈

一男子孟夏折腿出血過多其初眩暈眼花後則昏憤此陰血傷損陽火熾甚制金不能平木木旺生風所致急灌童便更用人參當歸各五錢荆芥川芎柴胡白芍白朮各二錢山梔黃芩桔梗各一錢甘草五分

服之隨爽又用四物參耆各三錢生地柴胡各一錢
四劑煩躁悉去

濕痰作痛

大宗伯沈立齋孟冬閃腰作痛胸間痰氣不利以枳殼
青皮柴胡升麻木香茴香當歸川芎赤芍神麴紅花
四劑而瘥但飲食不甘微有潮熱以參耆白朮陳皮
白芍各一錢歸身二錢川芎八錢軟柴胡地骨皮炙
草各五分十餘劑而康

劉尚寶體臂閃作痛服透骨丹反致肢節俱痛下體益甚以二陳南星羌活防風牛膝木瓜蒼朮黃芩黃柏治之身痛遂安以前藥再加歸尾赤芍桔梗治之而痊鄭吏部素有濕痰孟冬墜馬服辛熱破血之藥遍身作痛發熱口乾脉大而滑此熱劑激動痰火為患耳治以清燥湯去人參當歸黃芪加黃芩山梔半夏黃柏熟痛頓去患處少愈更用二陳羌活桔梗蒼朮黃柏薑製生地當歸遂痊

肝火作痛

楊司天骨已入絡患處仍痛服藥不應肝脉洪大而急此肝火盛而作痛也用小柴胡湯加山梔黃連二劑痛止用四物山梔知柏調理而康

血虛作痛

一婦人磕臂出血骨痛熱渴煩悶頭暈日晡益甚此陰虛內熱之症用八珍加丹皮麥冬五味骨碎補肉桂及地黃丸治之瘡愈却去桂加牛膝續斷二十餘劑

而悉愈

骨傷作痛

一小兒足傷作痛肉色不變傷在骨也頻用炒葱熨之
五更用和血定痛丸日間用健脾胃生氣血之劑數
日後服地黃丸三月餘而瘥

一小兒臂骨出絡接入腫痛發熱服流氣等藥益甚飲
食少思以葱熨之其痛即止以六君黃芪柴胡桔梗
續斷骨碎補治之飲食進而腫痛消又用補中益氣

加麥冬五味治之氣血和而熱退愈矣

氣虛血滯

戴給事墜馬腿腫痛而色黯食少倦怠此元氣虛弱不能運散瘀血而然耳遂用補中益氣去升麻柴胡加木瓜茯苓白芍白朮治之而痊

氣虛不潰

少宗伯劉五清臙傷一塊微痛少食用六君子湯倍加當歸黃耆其痛漸止月餘瘀血內涸而不潰彼以為

瘥此陽氣虛極須用調補不從至來春頭暈痰涎壅塞服清氣化痰病勢愈盛脉洪大而微細此或輕取重取之分欲以參芪歸朮附子之類補之不信至秋初旬因怒昏憤而厥

氣虛壅腫

一婦人腫臂腕腫大已三月手臂日細肌瘦惡寒食少短氣脉息微細此氣血兩虛也遂投補中益氣加肉桂引諸藥以行至臂再加貝母香附以解久病之鬱

間服和血定痛丸以蔥熨之腫消二三因怒患處仍
脹胸膈兩脇微痛以前湯更加木香山梔半夏桔梗
服之少可復因驚不寐少食盜汗以歸脾湯加五味
麥冬二十餘劑而安腫消三四手臂漸肥但經水過
期而少此心脾之血未充足而然也乃用八珍加五
味麥冬丹皮遠志香附貝母桔梗四十餘劑諸症悉
愈後因怒發熱譫語經水如涌此怒動肝火以小柴
胡湯加生地二錢一劑遂止以四物加柴胡調理而康

州守陳克明子閃右臂腕腫痛肉色不變久服流氣等藥加寒熱少食舌乾作渴曰傷損等症腫不消色不變此由氣虛而不能運當助脾胃壯氣血為主遂如法治之不二月形氣漸充腫熱漸消半載諸症悉退體臂如常

一小兒閃腿腕壅腫形氣怯弱欲治以補氣血為主佐以行散之劑不信乃內服流氣飲外敷寒涼藥加寒熱體倦日夜發熱脉息洪大氣血虛極也治之無功

後肉潰瀝盡氣血而亡

瘀血腫痛

一男子閃傷右腿壅腫作痛謂急砭去滯血以補元氣
庶無後患不信乃外敷大黃等藥內服流氣飲後涌
出穢膿枕許其膿不止乃復請治視其腿細而脉大
作渴發熱辭不治後果歿

臆友王汝道環跳穴處閃傷瘀血腫痛發熱作渴遂砭
去瘀血知其下焦素有虛火用八珍加知柏牛膝骨

碎補四劑頓止用十全大補少加黃柏麥冬五味三十餘劑而愈

筋傷壅腫

李考功子十四歲脚腕閃傷腫而色天日出清膿少許肝脉微瀦此肝經受傷氣血虛而不能潰難消之症也急止剋伐之劑不信乃禱用流氣等藥後果出爛筋而死

肺火衄血

張地官墜馬傷腿服草烏等藥致衄血咳嗽臂痛目黃
口渴齒痛小便短少此因燥劑傷肺與大腸而致用
生地黄芩連知柏山梔山藥甘草以潤肺燥而生腎
水小便頓長諸症並止以山藥五味麥冬參耆芎歸
知柏黃芩炙草以滋陰血養元氣而瘡斂

肝火出血

俞進士折腿骨已接三月尚發熱出汗不止諸般醫治
不應左關脉洪數此肝火熾甚血得熱而妄行也遂

投小柴胡湯加山梔白芍生地防風血止熱退又用
八珍五味麥冬治之瘡口即愈

田宗伯姪仲秋因怒跌仆遍身作痛發熱衄血肝脉弦
洪曰久衄脉弦洪乃肝火盛而制金也至春則肝木
茂盛而自焚或戕賊脾土非易治之症當滋腎水以
生肝木益脾土以生肺金乃雜用瀉肝火等劑歿于
仲春之月

一婦人因怒仆地傷面出血痰盛昏憤牙關緊急曰此

怒動肝火氣逆拂鬱神明昏冒而卒倒也兩手脉洪
大而無倫次以小柴胡湯加黃連山梔芎歸橘紅茯
苓薑汁而甦

胃火作嘔

一膏粱之人跌腿青腫作痛服辛熱之藥反發熱作喘
患處益痛口乾唇渴此膏粱之人內多積熱更服辛
熱之劑益其胃火而使然也頻飲童便以清胃散加
山梔黃芩甘草治之頓止患處以葱熨之腫即消散

陰虛作喘

舉人杜克宏墜馬服下血藥反作喘日晡益甚此血虛所致耳非瘀血為患遂以四物加參耆五味麥冬治之其喘頓止又用補中益氣加五味麥冬而愈此症果係瘀血蒸熏于肺而喘宜活血行血亦不可下若面黑胸脹或膈痛作喘當用人參一兩蘇木二兩作一劑水煎急服緩則不治產婦多有此疾

陰虛發熱

楊進士傷手指焮痛發熱服寒涼之藥致飲食頓減患處不潰用托裏養血之藥食進而潰後因勞每日晡發熱此陰虛而內熱也以四物軟柴胡地骨皮乃退更用養血氣之藥而瘡斂

氣血虛熱

一男子墜馬腹有瘀血服藥下之致發熱盜汗自汗脉浮濇以為重劑過傷氣血所致投以十全大補湯益甚時或譫語此藥力未及而然也以前藥加炮附子

五分服之即睡覺來頓安再劑而痊

陽氣脫陷

梁閣老姪跌傷腿外敷大黃等藥內服破血之劑遂致
內潰為針出穢膿三椀許虛症悉具用大補之劑兩
月餘稍能步履因勞心手撒眼閉汗出如水或欲用
祛風之劑曰此氣血尚未充足而然也急以艾炒熱
頻熨肚臍此本法羅謙父嘗用之并氣海穴處以人參四兩炮
附子五錢煎灌良久臂少動又灌一劑眼開能言但

氣不能接續乃以參耆歸朮四味共一斤附子五錢
水煎徐徐服之元氣漸復飲食已進乃去附子服之
而瘡愈

膽經血少

一女子年十七閃右臂微腫作痛寅申時發熱決其膽
經血虛火盛經水果先期而至先以四物合小柴胡
湯四劑熱退更以加味四物湯加香附地骨皮山梔
各五分芩連芩草各二分二十餘劑其腫亦消乃去

黃連山梔又五十餘劑經水調而元氣充矣

腎經虛怯

儒者王清之跌腰作痛用定痛等藥不愈氣血日衰面耳黧色曰腰為腎之府雖曰閃傷實腎經虛弱所致遂用杜仲補骨脂五味山萸菴蓉山藥空心服又以六君當歸白朮神麴各二錢食後服不月而瘥一三歲兒閃腰作痛服流氣等藥半載不愈此稟腎氣不足不治之症也後果歿

痛傷胃嘔

一婦人傷指手背俱腫微嘔少食彼以為毒氣內攻診其脉沉細此痛傷胃氣所致也遂刺出膿梔許先以六君子藿香當歸而食進繼以八珍黃芪白芷桔梗月餘而愈

氣遏肉死

一男子修傷足指色黑不痛而欲脫此因陽氣虛不能運達于患處也急去之速服補劑以壯元氣否則死

肉延足必不救矣不信果黑爛上脰而死

一女子數歲嚴寒上京兩足受凍不仁用湯泡潰至春十指俱爛牽連未落先用托裏之劑助其陽氣自潰脫得保其生此因寒邪遏絕運氣不至又加熱湯泡潰故死而不痛也嘗見人嚴寒而出凍傷其耳不知痛痒若以手觸之其耳即落當以暖處良久或熱手慰之無恙若以火烘湯泡其耳即死至春必潰脫落矣北方寒氣損人若此可不察之

涼藥遏經

雲間曹子容為室人中風灌藥誤咬去指牛節焮痛寒熱外敷大黃等藥內服清熱攻毒患處不痛不潰膿清寒熱愈甚此因涼藥遏絕隧道而然也遂敷玉龍膏以散寒氣更服六君子湯以壯脾胃數日後患處微痛腫處漸消此陽氣運達患處也果出稠膿不數日牛指潰脫更服托裏藥而斂

上舍王天爵傷足焮腫內熱作渴外敷內服皆寒涼敗

毒患處益腫而不潰且惡寒少食欲作嘔吐此氣血俱虛又因寒藥凝結墜道損傷胃氣以致前症耳遂用香砂六君子芎歸炮薑外症悉退惟體倦哺熱飲食不甘以補中益氣湯加地骨皮五味麥冬治之而愈州守王廷用傷指即用帛裹之瘀血內潰焮腫至手謂宜解患處以出瘀血更用推陳致新之劑不信乃敷涼藥痛雖少止次日復作又敷之數日後手心背俱潰出瘀穢膿水尚服敗毒之劑氣血益虛色黯膿清

飲食少思仍請治投以壯脾胃氣血之劑由是膿水漸稠而愈

錢國賓曰甲子春余舟泊清江浦時征遼官兵沙船兩岸打開水急索斷頭目王元跌倒頭向地脚朝天正對石樁腦蓋骨圓圓如鍾大竟離頭墜地去人大許衆兵圍看余見而呼曰某知接骨今病者破腦魂魄驚散怕人不敢歸竅汝等在此此人立死矣且暫散診其脉洪浮腦骨雖墜腦膜未破可救先安腦骨急

取舟中接骨藥散于周圍內用四物湯加桃仁大黃
各一錢紅花五分恐血攻心移病者于無風之室令
倚勿睡睡則血上至半日始甦醒次日飲食日日與
接骨藥一服十日而痊接骨神方土鼈虫四十九個
酒炙黃暴死人骨一兩螳螂煨黃五錢象虱十個牛
兩錢十個煨紅醋淬取末自然銅三錢煨紅醋淬乳
香沒藥各三錢木香二錢麝香五分為末再服七分
熱酒調下照量加酒以行藥力服後骨中自响輕者

數服重者十餘服接骨如故

續名醫類案卷五十九